

祥刑典

祥刑典第六十二卷

律令部彙考四十八

皇清

康熙十九年

大清會典康熙十九年題准邊禁等地方劫盜者巡察官兵緝拿如抗拒卽斬不曾抗拒被獲者果係盜賊俱斬妻子家產牲畜籍沒給失主不係盜賊因其壞邊爲首一人絞除妻子外家產牲畜籍沒餘各鞭一百罰三九內地人出禁地劫盜者官兵拿獲照內律治罪如內外官兵失於覺察或失主或旁人捉獲者內地官革職鞭一百折贖外地官革職罰三九內外兵丁各鞭一百盜賊之主知而不舉被人出首者以窩盜治罪出首人令赴願往旗分若出首情虛係官革職罰三九庶人鞭一百罰一九

又題准審擬強盜已經供出失主及招認夥賊之數明確者卽行歸結不許續行妄攀拖累又覆准駐防奉天等處及各邊口官員有緝獲盜賊者照防禦議敘若汛地一年內有三次盜

案以上不緝獲一名者該管官罰俸六個月六次以上不緝獲一名者罰俸一年

又題准凡竊盜贓數不滿一兩者免刑審其拿獲之兵丁及查緝之步軍校亦不賞銀記檔

又議准旗下人私往平民地方借端挾詐囑託行私犯擾民等弊者係平人枷號三個月鞭一百係官革職鞭一百不准折贖失察之佐領罰俸三個月驍騎校罰俸六個月撥什庫鞭八十若將家僕明知差去者係平人鞭一百係官革職家僕枷號一個月鞭一百其有取債探親事若犯者係平人鞭一百係官革職失察之佐領罰俸一個月驍騎校罰俸三個月撥什庫鞭五十若將家僕明知差去者係平人鞭八十係官罰俸一年家僕亦鞭八十至莊屯居住之人并家僕有私出境犯此等事者佐領驍騎校撥什庫及本主俱免罪將屯撥什庫照撥什庫例治罪又覆准督撫所屬官員保題留任及補用者槩不准行仍將保題官降一級留任

又題准凡不領印票販馬者係旗下人枷號兩個月鞭一百係民責四十板流三千里馬入官凡邊海官員題補又題准各省將軍督提鎮等違例坐名保題者各一級留任

凡上司向屬吏借貸者又議准照貪官例治罪又議准州縣官借送出差官員下程科斂百姓

者照貪官例治罪其督撫司道府廳等官俱照失察貪官例治罪

又議准凡貪贓官役免死減等發落者照例安插于烏喇地方罪不至死而擬流者流徙尙陽堡

又議准官員被上司揭報糾叅之後始首告上司索詐苛求者照京察大計降革官員控告例處分

又覆准行取官員離任遲延者該督撫司道各官俱照陞員離任督催不力例處分

又題准除王以下入八分公以上公主以下郡君以上不議外縣君未入八分公以下覺羅民公以下官民人等除先有太監不議外嗣後如買用投充者太監入官收用之人交該部從重治罪

又覆准奉天地凡新來之民在民界內安插緣邊次第墾種其原在旗界內居民有願移民界內墾種者有仍願在旗界內墾種原地者聽從其便至旗人民人力不能開墾荒甸又復霸佔者嚴查治罪

又題准製造盔甲其鐵務要摺打錐光製造箭枝務要箭心堅長手鑽安釘如草率造作匠役人等一併治罪

又題准或攻城或野戰如將陣亡屍骸不能救出者同戰之叅領閒散官護軍校驍騎校降二級調用領戰之夸蘭大降一級調用領戰之大臣罰俸一年

又題准直隸山東江南准用裝載五百石以下船隻沿海行走倘有裝載五百石以上大船通大洋行走者照例從重治罪如貪黷官役兵丁借端留難需索者該督撫提鎮嚴查指名題叅若徇情不行題叅從重治罪其出入船隻令海口官員揣理出則驗船給照入則估料徵稅每季造冊報部

又議准凡違禁偷採人參仍照康熙十五年定例治罪爲從之人各枷號兩個月係旗下鞭一百係民責四十板其邊外居住山海衛所屬兵民及

盛京直隸山東沿海處所有偷載人參貿易者照偷採人參例治罪

又令人命關係重大監候秋後重犯招冊每省著各爲一本陸續具奏

又題准認工復職贖罪人員將原估銀兩定限赴工部交納差各部賢能司官修理其贖罪人犯有保官者卽令出監依限上納過限不完題叅照原擬治罪其認工交銀者隨到卽收不得借端留難指勒

又議准革職處分等官及各項人犯有願認修葺

京都城樓公署及倉庫牌樓贖罪者除十惡等真正死罪奸細光棍誣造叛逆放火等罪不准認贖外其餘斬絞重罪併充軍流徙人犯具呈工部查核情罪輕重與例相符准其具題定限修理完日免罪

又令凡六月內應行正法之人俱俟立秋後正法部內正法事件亦俟立秋後陸續具題又議准家僕投營挾制主人者不分首從得財與未得財俱立斬

又議准貪贓官役免死減等發落者安插烏喇擬流者流徙尙陽堡其餘各犯仍照律行

又議准凡誘取不知情之人口者爲首之人擬絞監候爲從者照例治罪如被誘之人知情和同者仍照律行其聚衆搶奪路行婦女照光棍例爲首者立斬爲從者俱擬絞監候秋後處決

又議准惡棍事犯不分得財與未得財爲首者立斬爲從者擬絞監候秋後處決旗下民人結夥指稱隱匿逃人索詐財物者亦照此例治罪

又題准外藩蒙古扎薩克王貝勒貝子公台吉等有以本旗地方無草欲移住相近旗分及斥堠內者於七月內來請院遣官查視所居地如果無草請移處草果茂者如其所請若所居地草甚盛而請移他處者將所請扎薩克議處他月來請者槩不准

又題准外藩蒙古四等台吉以上遣往管兵陣亡者照都統例給身價銀兩陣亡中傷殘疾病故官兵身價賞卹等銀俱照內例給與

又議准攬和廢錢舊錢行使者係民責四十板枷號一個月係旗下鞭一百枷號一個月廢錢舊錢入官制錢給舉首之人戶部再賞銀十兩又題准各關解銅不許在

京城辦買違者辦買人係旗下枷號三個月鞭一百係民枷號三個月責四十板流三千里銅觔銀兩入官如被傍人出首銅觔銀兩給出首之人監督知令辦買者革職各差解銅至臨清該關官會同知州查驗各給印文至天津該關官會同天津道查驗各給印文至崇文門該監督

會同科道查驗給與印文若不查驗給與虛數印文者革職

又議准凡有私鑄紅衣等大小砲位者不論官兵民人并匠役俱處斬妻子家產入官鄰佑主人里長等擬絞監候文武肅汛官革職兼轄官降四級調用督撫提督總兵降二級留任

康熙二十年

刑部見行則例康熙二十年九月二十六日奉

上諭三旗包衣佐領所管有兇惡光棍並好鬪惡徒已經嚴察發往烏喇又各該佐領包衣大或稱其人原小有過惡今已改作好人遞有保呈者記檔後如犯事一併重處其八旗內豈無兇惡光棍好鬪惡徒傳與議政王貝勒大臣等著議應否照此例遵行之處欽此議政王貝勒大臣等議覆兇惡光棍好鬪惡徒生事行兇無故擾害良人可謂惡極八旗內豈無此等之人應行嚴察亦發往寧古塔烏喇懲惡戒後請

敕該部卽照此例速行等因具題奉

旨著交兵部通行八旗令該都統副都統叅領佐領等各旗佐領內自官員以下有兇惡光棍好鬪

惡徒嚴察送部著部奏聞

大清會典凡文官封贈康熙二十年奉

恩詔除軍機貪污革職者追奪若因公註誤與別項革職者永免追奪

又欽奉

恩詔出首逆本銀兩者著永行停止如有首告之人從重治罪欽此

又議准前場文字限六百五十字若將逾額之卷謄錄取中照應帖不帖例處分

又題准凡各省駐防旗下拿獲逃人仍令將軍城守尉等與同城居住之督撫或官職大者會同審理

又題准凡布忒海之村逃人事件交寧古塔將軍發落

又題准凡逃人初供之主不認者令審理逃人之督撫刑訊照例治罪

又覆准凡有司自四月以後有受理細事通賄起滅及違例用大枷夾棍追比錢糧慘斃人命者該督撫嚴查叅究若督撫徇情不叅受害之人首告及別有發覺者一併議處

又覆准浙江運丁私勒民兌另立私截名色嚴行禁止

又議准凡督撫糾察屬官款件果實者將經營之衙役一併治罪

又題准官員曾受僞劄乃誑稱並未從逆者革職提問徇情出結之官處分同

又議准官員之祖母母妻毆死奴僕者照子孫本夫品級罰俸一年故殺者罰俸一年追人入官其子孫本夫已故者照原品追取銀兩

又令凡三旗包衣佐領及八旗內有刁惡棍徒非法橫行詐害良民者該旗都統副都統叅領佐領等嚴查送部卽行奏聞發往寧古塔烏喇地方

又題准凡冒取出邊票往接厄魯忒喀爾喀等處人欺騙進

上之物或貢物沿途貨賣及進館後進

上未畢先自貨買而擅爲通事者係旗下人枷號三個月鞭一百其家主係官罰俸六個月係庶人鞭八十佐領驍騎校罰俸三個月撥什庫鞭五十係民枷號三個月責四十板該管官罰俸三個月總甲責二十板護送官及看管官失於緝獲各罰俸三個月撥什庫兵丁各鞭五十進

貢事畢後本院派出官員筆帖式監視貿易貪利洩漏內事者照光棍例治罪

又題准山海衛所屬城堡兵民偷採人參者亦照康熙十五年定例治罪

又題准寧古塔烏喇人在禁河內採捕蛤蜊及採蜂蜜捕水獺人偷採東珠者照偷採人參例爲首者擬絞監候爲從者枷號兩個月鞭一百各項捕牲人將本身印票轉賣他人者買賣之人各枷號兩個月鞭一百

又題准本地方官確注盜犯年貌住址的實姓名一面詳請本省督撫移咨轉緝一面差人移關該地方官掛號添差協緝不許給批竟提違者將行提之官照誣良爲盜例治罪如住賊之地方官徇庇不行協緝亦應議處至於本省內隔屬關提人犯亦令向該地方官掛號添差拘提違例擅自拘拿者將捕役照誣良爲盜例准罪原差之地方官照失察衙役誣良爲盜例議又議准道路村莊失事州縣等官及帶汛武職官一年限滿不獲降一級留任再限一年緝拿無級可降之官革職仍留任限一年緝拿如再不獲調用革職同城之知府與捕盜之同知通判初叅停陞罰俸六個月限一年緝拿如不獲罰俸一年照案緝拿道官及兼轄武職初叅罰

俸六個月免其停陞限一年緝拿限滿不獲罰俸一年若未滿一年之限陞遷者照離任官例罰俸一年

又題准在斥堠叅領不發遣兵丁各防汛地及佐領驍騎校不各在汛地而往叅領處同坐或在汛地而馬匹被盜者叅領佐領俱革職罰三九驍騎校革職罰二九撥什庫兵丁鞭八十巡馬兵丁鞭一百

又題准

皇上陞殿日於殿右簷下設滿御史二員諸王行禮處兩旁設滿御史各二員各官行禮處兩旁設滿御史各二員漢御史各二員侍立糾儀其常朝日及八旗官員上朝日各官左右兩班排坐處班首派滿漢御史各一員班末派滿漢御史各一員吏禮二部亦派滿漢官公同監視如有越次私語或互相背坐及先行越散者指名題叅如監視官知而不糾者一併議處

又覆准叛案牽連流犯身故妻子既免流徙反案牽連流犯身故其妻有子者仍流徙無子者亦免流徙

又欽奉

恩詔流徙人犯在配所身死其妻子有願攜骸骨回籍者該地方官報部准其各回原籍欽此

禮部則例康熙二十年十二月二十日因吳三桂等羣逆剪除大赦

詔款一凡官吏兵民人等有犯除謀反叛逆子孫殺祖父母父母內亂妻妾殺夫告夫奴婢殺家長殺一家非死罪三人採生折割人謀殺故殺蠱毒魘魅毒藥殺人強盜妖言十惡等真正死罪不赦外其謀反謀叛犯人妻妾子女家產應入官及父母祖孫兄弟牽連犯人應流徙並修造宮殿

陵寢工程不固失陷城池行間獲罪凡發掘墳塚者亦在不赦其餘自康熙二十年十二月十二日昧爽以前死罪軍罪以下已發覺未發覺已結正未結正咸赦除之有以赦前事告訐者以其罪罪之

一內外文武官員除大計軍政處分外有因公詿誤降級留任罰俸革職戴罪住俸等項並見在議革議降議罰戴罪住俸等項著開復寬宥

一凡貪官犯贓罪應至死與不應至死者俱免罪仍革職追贓永不敘用

一凡應追賠贓私察果家產盡絕力不能完者准與豁免其妻子亦免入官流徙

一逃人事情槩准赦免

一凡強盜雖同夥殺人本人未經下手者若自行投首准與免罪

一凡有叛逆謀死人強盜等罪牽連對質候審監禁人犯在獄年久恐無辜致死該部院直省督撫確審如無憑質對情可矜疑者卽行奏請釋放

一凡流徙人犯在流徙處所身死其妻子有願攜骸骨歸籍者該地方官報明該部准其各回原籍

一出首逆本銀兩著永行禁止如有首告者將首告之人從重治罪

一凡失陷城池行間獲罪革職及貪贓革職官員封贈仍行追奪外其因公誣誤革職官員封贈永停追奪

一各處關差如有將不應納稅之物額外橫征差役四出分踞津隘擾害商民者該督撫題叅

若不行題叅事情發覺一併從重治罪

一河道漕運關係重大所關河漕一應情罪俱不赦免

一凡監守自盜不准赦免

一凡潛踞山海不服者如有率眾來歸悉赦已往仍量公議敘及受逆賊偽劄畏死逃避今來投首者亦著免罪

又十二月二十四日

太皇太后

皇太后上徽號

詔款一凡官吏兵民人等有犯除謀反叛逆子孫殺祖父母父母內亂妻妾殺夫告夫奴婢殺家長殺一家非死罪三人採生折割人謀殺故殺疊毒壓魅毒藥殺人強盜妖言十惡等真正死罪不赦外其謀反謀叛犯人妻妾子女家產應入官者及父母祖孫兄弟牽連犯人應流徙者亦在不赦並康熙二十年十二月二十日詔內所開不赦各款仍照前詔遵行外其餘自康熙二

十年十二月二十四日昧爽以前已發覺未發覺已結正未結正一應罪犯亦俱照前詔咸赦除之有以赦前事告訐者以其罪罪之

康熙二十一年

刑部現行則例康熙二十一年五月初九日奉

上諭諭刑部頃者逆寇殲滅海宇蕩平朕躬詣盛京展謁

永陵

福陵

昭陵以告成功因而巡行邊塞咨詢民間疾苦東至烏喇地方見其風氣嚴寒由內地發遣安插人犯水土不習難以資生念此輩雖干憲典但既經免死原欲令其生全若仍投畀窮荒終歸陪斃殊非法外寬宥之初念朕心深爲不忍以後免死減等人犯俱著發往尙陽堡安插其應發尙陽堡人犯改發遼陽安插至于反叛案內應流人犯仍發烏喇地方令其當差不必與新披甲之人爲奴以昭朕軫恤民隱哀矜保全之意爾部卽遵諭行特諭

又十二月初七日奉

上諭嗣後殺人重犯如有伊祖父伯叔兄弟陣亡者止敘明陣亡情由仍議死罪不得論功議免

大清會典康熙二十一年

諭儒學文廟關係文治理宜嚴肅潔清不許污穢侵占違者察叅治罪

又題准提學按臨考試州縣官有私派供給名色累民者叅處

又議准提學按臨地方量撥別縣書吏供事其掌案長接名色嚴行禁革所考各府仍令府官提調外其屬員槩不許迎接執事人員不許於退堂時傳遞關節遇考校日一槩封筒不許傳入間有公事俟試竣日方許開緘投進其生員交卷照例將浮票揭去帶回府州縣於正試卷外不許多備一卷違者聽該督撫據實題叅督撫徇隱者一併議處

又議准官員毆死族人奴僕者降一級調用故殺者降二級調用俱追人一口給主持刃殺死者革職鞭一百折贖平人毆死族人奴僕者枷號四十日鞭一百故殺及持刃殺死者枷號三個月鞭一百俱追人給主